

欽定大清會典事例

欽定大清會典事例卷一百八十五

戶部

倉庾

稽察倉儲

收糧上倉

稽察倉儲○雍正二年定各倉人役取具連環保結每人給以腰牌一應出入責令監督逐名查驗儻不實力奉行以致偷帶糧米事發將該監督一併叅處其牆上偷盜之弊責令看倉章京督率坐堆兵丁不時巡邏如有疏虞即將該章京交部議處○五年

諭在京各倉每倉或都統或副都統各一人御史中不

論滿漢每倉各委一人專任稽察之責其支放奏銷等事不必經管惟倉房滲漏牆垣損壞與倉內鋪墊及匪類盜竊各弊察出即行文倉場侍郎知之若倉場侍郎等遲延不及時辦理妥協即據實奏聞儻不能察出弊端以致虧損倉糧著落稽察之都統副都統御史與倉場監督等官分賠其通州三倉即照此例交與通永道通州副將稽察其失察分賠之例亦與京倉同○又覆准各倉積弊每於收米發米之時胥役串通家人少進多出監督失於覺察漸成虧空嗣後如虧空發覺將胥役照侵盜錢糧例

比監督減一等治罪。其虧空之米著落監督賠
六分書攢賠二分頭役花戶合賠二分。照例勒
限一年全完。限內不完著地方官將家產變賠。
○又定頭役作弊許書攢稟明監督監督作弊
許書攢立行稟阻。如不聽從許赴倉場衙門首
告。○十二年奉

旨。巡倉都統御史定為三年一次更代。○乾隆元年奏
准向例各倉監督三年差滿題請

欽點王公大臣會同倉場逐廠查驗。今監督差滿定
以二年錯綜更代。嗣後限以四年奏請查驗一

次○三年奏准各倉存儲糧米向例以算法二
五覈算每多錯誤嗣後以積方之法酌定二年
以內見方一尺照三斗一升六合之法三年以
外者每見方一尺照三斗四升之法其二年以
外三年以內者每見方一尺照三斗二升八合
之法丈算鑄造鐵尺分交戶部倉場並各倉嗣
後均照此尺丈量折算如違叅究○十六年奏
准新漕進倉收一廩即封一廩如恐米質蒸變
即於廩門上檐空出廩板四五尺宣通蒸氣以
下所上廩板即行加封以防弊端統俟深秋風

高物燥之時。即全行上板。封閉嚴密。○十七年
論巡視通州漕務。向例止差科道一人。專司催督漕運。
而倉場事務。則概不與聞。但通倉積弊甚多。現委大
臣盤驗。著增差科道四人。前往巡視漕務。凡收兌新
漕支發倉米。皆著就近稽察。至在京各倉。雖經委有
專員。亦著一同留心稽察。務期諸弊肅清。以副委任。
○又奏准京倉向係都統一。御史一人。專司
稽察。惟不能每日赴倉。稽察未為周密。嗣後除
都統直班。御史在城理訟日期外。仍酌量輪流
到倉稽察。如或疏略。令巡漕御史糾參。○又覆

准京通各倉每倉差御史一人稽察年終更代將一年內並無短收多發攙越廩座之弊據實奏明交部存案如奏報不實別經察出將御史一併交部議處其各倉收漕整廩倉場總督標封封固稽察御史加封各廩鑰匙交倉場衙門收存於點廩發米時發倉啟廩封固之廩每於夏冬兩季驗看一次重加封條新舊監督交代時整廩驗封零廩抽盤如有攙雜短少即指定某廩攙雜某廩短少揭報倉場總督及御史公同盤驗虧缺果實治罪勒賠其監督新舊交代

限兩月交完出結。出結之後。經倉場總督及御史盤出虧缺。即將新監督指名叅處。○十八年覆准。嗣後新漕進倉。每年四五六七八月間。將各廩鑰匙暫給監督收執。一遇大雨時。行通倉呈請總督御史京倉呈請都統御史。如有一人到倉。即行開封。及時查看。修補後。即時封固。以謹防範。餘月仍交倉場總督收存。儻該監督等不即時查看。滲漏致有浥爛等弊。各在監督。○二十年奏准。嗣後查倉大臣。如有出差升轉。原派官員仍留倉門。令其稽察。俟另派大臣到任。

後將所查事務再行交代○二十五年定各倉整廠責令都統御史等查驗貼封其殘廠亦俱由都統御史等查驗封識其開報成色米石於接准部文之日即行傳城支領並令都察院轉飭各指揮作速領糶如有遲延照例查叅○二十六年定京通各倉每年收放漕糧另派大臣隨時稽查將各倉收放贏餘各數逐年奏

聞由戶部開列各部院滿漢大臣名單奏請

欽派二三員稽查如有出差等事止有查倉大臣二員戶部即行奏請添派○三十三年議准各倉

監督交代時。如有未放完之米。令將任內原儲各年米數。及已放尚存各數。冊報倉場侍郎。委員查驗。整廩驗封。零廩抽盤。出具印結報部。○三十八年。奏准各旗支領米石。該旗都統不能前往。令副都統代往監放。如副都統無暇。令本旗蒙古漢軍都統代往。○三十九年。奏准八旗領米之日。該都統不能前往。令各旗派賢能參領。與稽察大臣御史等。悉心查察。設有違例滋弊。稽察大臣查出。而御史失於覺察。將御史一併叅處。如御史查出。而稽察大臣失於覺察。將

大臣亦一併嚴叅議處。○五十九年議定米商鋪戶人等有將兵丁米石違禁豫買者除將應領之米令該兵丁自行赴倉關支外將兵丁責處其用過鋪戶銀錢不准償還如姦商等仍敢索討或參佐管領等為之調停完結許兵丁等自行出首將索債之人從重治罪該參佐管領嚴行叅處。○又奏准每月部定倉口後即行知都察院衙門籤派滿漢科道各一人將該倉儲米廠座查驗標封至放米之日責成該科道率同該監督眼同領米旗員揭去氣頭移存空廠

再將應放之米一律放給。仍令各該倉監督將各旗所領米樣送部覈對。各該旗於領米完竣之日。亦將米樣送部。儻不相符。戶部據實查叅。其所存氣頭廩座。仍令該科道即時標封。俟出糶廩底時。再令該科道查驗開封。以防偷換。其查倉御史。毋庸奏派。所派監放之科道。扣除本衙門差使。用專責成。○又奏准。如遇文武鄉會試月。分不論滿漢科道。每倉籤派一人。其餘月分。仍照前定章程派往。○又奏准。通州中西二倉。除春秋二季支放。大員俸米。籤派科道監放。

外其支放看守通倉兵丁米石為數無多毋庸一律籤派○又奏准監放科道有與監督同旗籍者例應迴避○惟值文武鄉會試月分人數少時免其迴避○又奏准監放科道於標封廩座鈐用本科本道印信親身驗貼啟封時細加查驗○儻有移換等弊立即嚴查究辦○又奏准各該旗赴倉領米儻該倉監督與花戶人等以低潮之米任意攙和或短少米數以及勒索錢文等弊許兵丁等自行首告其領米旗員等亦即稟明各該都統將監放之科道及該倉監督一

併嚴叅花戶等從重究治如領米旗員領催及食米兵丁在倉生事有意需索該倉監督亦即呈明該科道將該都統及領米官員一併嚴叅領催及兵丁等亦從重究治○又奏准各旗都統副都統既在倉口監放甲米又有科道專司稽察所有向來另派都統副都統查倉之例應停止○又奏准各旗應領甲米令各該旗都統先期覈明所屬各佐領管領下應領米數人數造具清冊送部轉行倉場俟開倉之日即令該旗都統於一月限內將各該旗應領米石無論

滿洲蒙古漢軍包衣共分作十五起每起約領
十餘箇佐領管領之米陸續前往以免擁擠又
於每起內更番調派賢能章京一員領催四名
並於應食米之兵丁內挑派三四名令其赴倉
眼同領米以防撓雜剋扣之弊如限內不完將
監放之都統副都統及該科道並該倉監督均
照支放官員俸米遲延例罰俸一年○又奏准
八旗領出米石責成本旗都統或副都統會同
查旗御史公同驗明米色米數即將領出之米
籤掣佐領次序分給各兵丁約同原車分送交

卸。仍先期傳知各該佐領下食米之兵丁等於
領米之日。齊集倉門等候。俟米出倉。即刻驗放。
以免擁擠。並將一旗放竣日期報部查覈。○又
奏准。祿米倉開放緊急零檔米石。即派妥員。眼
同該倉監督。啟封監放。放竣後。用倉場印封封
固。責令該倉監督。將放過米數若干。尚存若干。
造具清冊。出具並無攙和情弊印結。送部。○又
奏准。八旗官馬。並各項官兵。拴養馬匹。及五營
差馬等項。每年應領豆石。照支放甲米之例。令
承領豆石之人。眼同該監督。一律勻放。儻有任

意撓雜等弊。准領豆。拴馬之人。回明該管衙門。查叅究辦。○又奏准。宗室王公。及公侯伯世職。並文職三品以上。武職二品以上。官員俸米。照舊赴通支領外。其文職自四品以下。武職自三品以下。世職自子男以下。俸米。即於祿米等十倉。就近闕支。派滿漢科道各二人。輪赴各倉。率同該監督等。照支放甲米之例。一體稽察。○六十年議定。各倉所儲江南省青腰白臍米石。每月開放甲米時。先將各該倉廩座字號。逐廩書籤封固。臨期該都統與監放科道。眼同闕定。

幾處再行開放。其闕定某處及米樣。仍令該旗該倉報部查驗。俟青腰白臍之米放竣後。即按定本倉年分最陳兩三年之米。亦照此例臨期闕掣。並令各該旗內務府繪各倉廩圖一分存旗。隨時覈對。○嘉慶四年議准。京通各倉及內倉查倉御史。仍循舊例。

欽派科道分往稽查。按年更換。以昭慎重。其每月籤掣監放之科道。應停止。○六年議定。驗收各倉進米事宜。專設御史稽察。毋庸奏派查倉大臣。○又議准。新任倉監督接收交代。將所管米石。

整廩驗封。零廩抽盤。如有攙雜短少。即指廩揭報倉場侍郎。及查倉御史。公同查驗。虧缺屬實。將舊任監督治罪勒賠。凡新任交代。限兩月出結。出結後。經盤出虧缺。即將新任監督指名叅處。○七年奏准。城外太平倉。隨倉之五堆至六堆。相隔一百七十四丈。七堆至八堆。相隔一百十四丈有餘。議於折中。添設堆撥二座。照各堆撥丁名數。撥用防守。再內城七倉。向不專派大臣稽查。嗣後照城外各倉。

欽派王大臣夜間稽查。以資防範。○八年定。嗣後禁

止番役親屬充當花戶。倉場侍郎仍不時稽查。如有番役子弟充役。致滋囤積回漕諸弊。即行嚴辦。又各倉闕米時。如有串通花戶挑兌好米。加增斛口者。責成各倉監督及查倉御史。嚴行查禁。儻不能查出。別經發覺。除將花戶從重治罪外。仍將該監督及該御史照例分別議處。○九年

諭嗣後著該監督等。每閱數日。在附近之官房輪班住宿一次。仍常川周密巡查。認真防範。以昭慎重。而絕弊端。○十三年。奏准安河橋豐益倉前係八旗官兵

防守。惟該倉離城較遠。嗣後撤回八旗官兵。照朝陽門外太平等五倉之例。就近改歸中營。每班派營官四員。精壯汛兵一百名。在該倉門及原設堆撥五處。十日一換。即責成該管之副將等官。晝夜稽查。如有代替。或該班不到。一經查出。即行嚴辦。○又奏。查看守各倉庫該班章京兵丁。恐有冒名頂替進班之弊。嗣後何旗直班。即由何旗儘數派委官兵。其不派官員止單派一二名兵者。徑行裁汰。儻該班官兵屆時患病。或有事故。即時報旗更換。再內倉著落正白旗。

看守原定有兵無官難以管束嗣後照各部院
看庫之例添官一員帶兵看守○十四年

諭現在倉儲正當積弊之後立法宜周所有城外各倉
支領俸米之文職四品武職三品以下各官並兵丁
月米均皆自本年八月為始屆期奏派御史二員再
由步軍統領衙門派司官二員於朝陽門外專司登
記每十日具奏一次如有出城售賣等弊立予嚴懲
並著於兩月內全行領完如逾限不領即行叅辦仍
責成倉場及該管各衙門一體嚴查毋懈○又定各
倉監督如遇緊要辦公之時有一人患病者即

申報倉場侍郎派員署理若但委胥役在廩口
收放者由查倉御史糾叅○十六年奉

旨綿課等奏會議查倉章程一摺朝陽門外太平等五
倉於嘉慶五年改定舊例由步軍統領衙門派撥北
左二營弁兵看守仍照向例分派王大臣每月夜間
輪流出城稽查數次原以防範該弁兵等偷安誤班
情弊但稽查之日豫先知照該衙門委弁前往劄門
則看倉官兵自必早得查倉之信不難豫作準備迨
查畢後仍可抽減人數懈怠曠班於防範之道殊屬
有名無實且城門黃夜啟閉該王大臣隨從多人看

門官兵勢不敢逐名盤詰恐姦究得以夾混出入非所以昭慎重著照所請嗣後毋庸欽派王大臣夜出查倉即照依豐益倉之例由步軍統領衙門添派北左二營將官在該倉廩等處上夜認真稽查如查有曠誤即稟報祿康等嚴叅究辦儻徇隱不報當並治以重罪其城內七倉查倉大臣著派綿課哈迪爾奕紹明亮瑚圖禮恭阿拉巴特瑪扎郎阿等八人輪班晝夜不時稽查如看守之旗員旗兵等稍有偷安情事亦即嚴辦示懲毋稍疏懈○又

諭各倉額設巡邏弁兵為數不多如果實力巡查何至

屢有偷竊之案嗣後責令管旗大臣派撥弁兵按照定數飭令親身到倉每日派員點查如有人數不足以及雇人代替一經查出從嚴懲辦○道光四年

諭京通十五倉各設有滿漢監督公同經理責任綦重該監督等向不在倉直宿未免疏於防範以致花戶經紀等乘機舞弊無所畏忌嗣後各該倉滿漢監督俱著親身駐倉分班輪流直宿飭令晝夜周歷巡查以冀肅清諸弊該倉場侍郎等仍隨時密行稽察毋任有名無實儻查有曠誤立即嚴參懲辦○二十年定倉存米石花戶有攙和情事一經查出即送

刑部治罪飭令分別賠補並將該監督從嚴叅處○咸豐元年奏准朝陽門外太平等五倉由步軍統領衙門添派北左二營將官在該倉等處上夜認真稽查如弁兵等看守曠誤稟報叅辦太平倉大萬安倉西面附城東面臨河添安

堆撥

太平倉舊設堆撥五處添設十四處大萬安倉新設八處

加派兵丁分

班住宿巡邏看守每屆五日輪派都司一員住宿稽察如遇弁兵曠誤徇隱不報一併治罪其城內七倉由查倉大臣等輪班晝夜不時稽查如看守之旗員旗兵等稍有偷安情事嚴辦示

懲○同治七年奏准各倉存儲米石必俟盤查清楚然後派進新漕如某倉查有虧短未經奏結即毋庸再進米石以杜掩挪仍由倉場將某倉存米實數咨報戶部○又奏准各倉額設章京披甲由各該旗都統揀派妥實之人親身到班認真巡守每遇收放米石之日即著直班章京披甲等協同緝拏竊米匪徒查倉御史不時到倉稽查如有偷安曠誤即行嚴叅○又奏准各倉收放米石之日該倉官役將倉內外閒雜人等概行禁止不准進倉如有攪亂倉務及身

後把持之人該監督隨時嚴拏懲辦

收糧上倉。○各省糧船到通正兌米於石壩交兌。改兌米於土壩交兌。坐糧廳察看米色呈總督倉場侍郎驗定。起斛上袋。用剥船轉運。正兌米由石壩裏河經普濟。平下平上。慶豐四牖。每牖換船至京城東便門外大通橋。掣袋驗米。應交太平倉者。仍水運。應交內倉及裕豐儲濟東萬安倉者。換車陸運。應交西萬安。祿米南新。舊太北新。海運富新興平。本裕豐益各倉者。水運至朝陽門外。換車陸運。均分送各倉。掣驗交收。

改兌米由土壩裏河應交通州西倉者至新城
南門外換車應交通州中倉者至舊城南門外
換車均陸運至倉掣驗交收其石土兩壩起斛
大通橋掣驗京城朝陽門通州新舊二南門換
車皆暫存號房石壩至京倉水運以經紀承領
陸運以車戶承領土壩至通倉水陸運皆車戶
承領今過壩過牐落屋上船皆雇夫負運白糧
運送內倉及通倉亦如之○正兌米一石原帶
耗米二斗五升石土兩壩斛量起卸過壩運進
京倉內除給運役五牐顛抗折耗米二升實進

倉正耗米一石二斗三升。倉中收受入廩除正米一石外。收耗米七升。尖米四升二合。又耗上加收尖米二合九勺四抄。盤折作正新耗米三升。共收正耗平斛米一石一斗四升四合九勺四抄。如改進通倉。除耗尖米同京倉外。多收盤折耗米二升。京倉謂之三升。盤折作正新耗米。通倉謂之五升。撥兌新耗米。共收正耗平斛米一石一斗六升四合九勺四抄。其餘八升五合六抄。以三升八合為旗丁餘米。四升七合六抄。作倉中篩颺折耗。○改兌米一石。原帶耗米一

斗七升。土壩斛量起卸過壩。運進通倉。除收正米一石外。加耗米四升。尖米四升二合。又耗上加收尖米一合六勺八抄。共收一石零八升三合六勺八抄入廩。如改進京倉。將正米一石內照例窰出二升。以作五牘顛抗折耗。實收正米九斗八升。耗米四升。尖米四升二合。又耗上加收尖米一合六勺八抄。共收一石零六升三合六勺八抄入廩。其餘米八升六合三勺二抄。照依前款正兌之例遵行。○順治初年定起卸漕糧。遵照定例平斛下攬。禁止淋尖踢斛。除每石

給錢二十二文外。僅有多收情弊。倉場侍郎訪
實。拏交刑部按律治罪。仍刊置一單。頒發各幫
運官。如運糧進倉。不挨次序。故為攙先。挪後。抑
勒索詐。許據實填報。從重懲處。如運官捏填容
隱。事發。一併題參。○十三年題准。京通各倉收
受漕米。以坐派紅單。即印到日為始。京倉定限
十日收完。印給倉收。移送坐糧廳轉發運員。寫
驗完呈。通州倉限七日收完。如過期不完。不印
給倉收。倉場侍郎查明題參。○康熙二十三年
題准。白糧自本地包裹。抵通過壩。若開包量兌。

恐致拋散向例用秤交兌應定限以正耗米一百六十斤為一石米色不淨加重十斤令旗丁赴倉親納短少賠補有餘給還○雍正二年題准經紀運米到橋車戶運米進倉舊例每米五十袋抽掣一袋一袋短少餘袋照數均賠於各役腳價內扣抵嗣後酌定數目不許多欠經紀係船運每十萬石定掣欠二百石大通橋車戶係陸運每十萬石定掣欠二百五十石通倉車戶係水陸並運每十萬石亦定掣欠二百石每石秔米作價銀七錢秣米六錢准於腳價內扣

抵若此外再有多欠除不准將腳價扣抵外仍照盜賣漕糧例治罪每秬稔米一石作價銀一兩四錢交與地方官著落家產變賠○又定各倉有虧折餘米者照議定老米七錢稔米六錢粟米五錢例交與該旗該地方官勒限一年將滿漢監督等嚴追如限內不完即行題叅從重治罪著落家產賠補○四年題准白糧過壩坐糧廳每十包秤驗一包以一百六十斤為一石如斤數不足鈐印包上報倉場移知倉監督至該倉交收之時倉場侍郎親詣倉內驗明過斛

如有短少。責令運軍補足。○又覆准石土兩壩堆存糧袋。責令經紀車戶鋪墊席箔。以防霉爛。儻奉行不力。致有霉爛。查出將布袋糧米勒令賠補。並將該役責革。如倉場及御史不能查出一併交部議處。○又覆准漕糧卸載拋散米粒。責令坐糧廳率大通橋監督設法埽收存儲。俟漕糧運竣之日。通計埽收數目。由倉場侍郎具奏。以為冬月煮飯賑貧之用。○又定埽收數目。倉場侍郎具奏後。由太平倉驗收。與該倉成色米一律待糴。○又奏准改兌糶米二十三萬。從

前原存通倉。今通倉稜米數多。廠座不敷。應令
統進京倉。○五年題准。失風挂欠。贖耗米。免
其賠補。其失風挂欠正米。照數追補。○六年覆
准。各省交兌漕糧。監兌官每船各兌一石。封存
鈐印。到淮。總督查驗。加封抵通時。倉場侍郎率
坐糧廳。照樣驗封。起卸。僅有攙和等弊。將升軍
一併究處。○又題准。交收漕糧。將杭稜粟米配
搭均勻。令各倉輪流籤掣分撥。○又議准。交兌
白糧。責令地方官。將徵收樣米。封存運通。倉場
照樣比對驗收。○又題准。內倉需用白米。次白

米令各幫掣籤輪流運送○七年覆准內倉交
收白糧於弁軍投文之後照十日定期收竣給
發完呈詳報倉場察覈○又奏准各倉收受漕
糧舊例收竣之後開具揭帖呈送倉場侍郎察
覈嗣後增設連三編號印單於收米十日內一
送倉場侍郎一移坐糧廳一留倉存案其各倉
所送揭帖挨次編號填註經承姓名毋許洗補
倉場侍郎按照號數黏連鈐印以備稽察○又
覆准白糧交倉餘米照漕例顆粒不許出倉先
儘挂欠之弁軍買抵如無欠白弁軍照抗米價

值給發。○又覆准漕糧抵壩令坐糧廳驗明米色方許經紀車戶運送各倉交收。○八年題定收完糧米舊例限五日內給發完呈嗣後統限十五日給發。儻有藉端勒指者即行叅處。○十二年覆准京通各廠雍正七年以後之米准報氣頭一二百石廠底三十五石惟裕豐儲濟兩倉係七年新建各廠米隨收隨放存儲未久止准氣頭廠底數十石。○又奏准每開放一廠米石通完之後令監督查明氣頭廠底米數若干估定成色並將該廠收存年分逐一聲明仍委

員查驗確實。如果所報成色屬實，並與各倉應有氣頭廠底之數相符，即行咨部發糶。其有年分未久，氣頭廠底為數過多，與現在各倉實屬不符，立即指叅。○乾隆元年奏准裕豐儲濟二倉米有陳積六七年不等者，照京通各倉之例，准報氣頭廠底。惟儲濟倉內乾隆二年增建之廠，仍照數十石之例開報。俟乾隆十二年後，照各倉一例辦理。○三年奏准通倉舊存糶米支存無幾，不敷支放。嗣後將改兌糶米每年撥存通倉十三萬石，其餘仍進京倉。○又題准通州

土壩車戶每年掣欠數多。扣追難償。嗣後每石准其掣欠八合。照七錢六錢之例買餘米抵補。此外若再多欠。仍照一兩四錢之例於腳價內扣抵。○又覆准向例內倉歲進白糧二萬餘石。今

禁城兵丁及內監人等白米改給秬米。應改進漕糧萬五千石。抵進白糧七千石。其一應收受遞減曬颺折耗運軍餘米。並收米之連單倉收完呈。以及腳價茶果等項。統照京通各倉之例。○又奏准各倉收儲糧米。向例每廩以萬一千六

百石為額。今各倉所存之米。或多或少。且有奇零尾數。難以覈算。應酌定每廩以紅斛正米萬石。定為常額。毋許贏縮。如有零數。別儲一廩。○又覆准通倉抽掣米數。如有書攢人等。勾通經紀。將掣欠之數。以多報少。折價侵肥者。總督倉場侍郎查究。○又奏准各倉收儲黑豆。向照米石之例遞減。惟黑豆質本堅硬。隨收隨放。並無消耗。嗣後遞減之數。不准開銷。○四年奏准通倉稻米不敷支發。將應運京倉秬米二萬石。改撥通州。以抵不敷稻米。○又奏准豐益倉向例

每歲進米十五萬石。今積數多。應減半撥運。每年減收腳價茶果銀三百五十餘兩。於坐糧廳衙門支取。○七年議准。內倉每年約放杭米二萬四五千石不等。今倉場僅撥浙江各衛所額解紅斛杭米一萬五千石。合平斛米一萬七千八百九十四石一斗。每年不敷米五六千石。至七八千石不等。於額撥米數之外。增撥紅斛杭米五千石。以供支發。○十二年奏准。豫省漕糧豆石。向來均以二五收受。外有每石三升邊耗米豆。並不起卸。在各丁進倉三升八合餘米。

豆內照數扣抵其原運三升邊耗皆歸旗下嗣
後該省隨正邊耗米豆照數起卸三升八合餘
米照例給予價值○十三年題准豫省漕糧改
徵麥石總以乾圓潔淨為準無論黃白大小一
律兼收僅有攙和等弊即行指叅至進倉時照
收受漕米之例抽掣驗看計算折耗將原備節
颺麥石抵補如有餘贖一律作正開銷○十四
年議准各倉每廩儲正米一萬石除去掣欠減
耗等數為數仍屬零星嗣後每廩派米以一萬
一千石為準○十六年議准旗丁運米到通例

由倉場衙門坐派而

圓明園沙子營及薊州易州等處道里稍遠守候
需時以致錯營規避嗣後輪幫挨派勒石永遠
○又議准河南山東運京黑豆擇廠產最多之
儲濟萬安舊太海運等四倉酌量派儲各倉既
經儲豆應少儲米數萬石則積儲均而存倉年
分可以相等○十七年復准嗣後兌漕之際令
稽察御史會同監督掣驗嚴禁胥役需索務期
米色明潔斛面平足如有賄屬濫收等弊即將
監督叅處並令步軍統領多差幹役嚴行緝訪

如有胥役舞弊即嚴拏治罪。○又覆准各倉儲米每廩以正米萬石為常額毋許或多或少。又新糧不得攙入舊米廩內進米時務令倉場總督分定廩座一面將陳廩封固俟進米完日與稽察御史親赴倉內丈算覈足開明所收米數並驗收監督經管吏攢姓名收存年月標置廩門封固註冊報部。○又奏准各省起運漕糧總漕派發全單開明船米數目抵通交卸完日領運千總齎赴部科查驗以稽完欠向未立有限期守候需時嗣後完糧之後於三日內將全單

呈明倉場。倉場於三日內移送戶科查驗。戶科於五日內移送戶部。戶部於五日內驗明鈐印。令該弁赴部當堂給發。至造寫大小完呈並架冊概行停止。○二十二年奏准京倉收存米石原係按月遞減銷算。其氣頭廩底米石發城糶賣。今北倉兌收米石已有加耗二升。不便照京倉遞減開銷。自應責令經紀照掣欠逾額例。於該役腳價銀兩內扣補。○二十五年議准漕糧起壩過牆掣欠數目。石壩每百石不得逾二斗。大通橋不得逾二斗五升。其欠在額內者照收。

買餘米例折銀交庫。即於現年著追。不得俟次年。如逾額在三斗以內者。著落各經紀於當年買米交倉。不准折銀。三斗以外者。除追米交倉外。仍嚴行責處。若多至五斗以上者。除追交米石外。仍照盜賣漕糧例治罪。土壩運米逾額米石。亦照石壩大通橋之例辦理。○又定通倉所存米石。已八九倍於所放之數。嗣後所進米石。以二十萬石內外為率。其餘儘數俱進京倉。○三十年定漕糧抵壩日起米數。本以三萬石為率。其或陰雨難以起運。不足三萬之數。總於天

晴路乾之時上緊趕運務於八月內竣事○三十三年定每年新漕到通倉場將各色米石均勻派儲○三十六年定通倉從前每歲派進漕米四十八九萬石而兩季所放俸米止需三十五六萬石積至乾隆二十五年存米過多經倉場奏明嗣後每歲止派進通倉二十萬石俟陳積疏通再行照舊辦理今陳米業已疏通向後每年派進通倉漕米三十餘萬石以供支放○又奏准通惠河修築漫口雨水之後車輛難行所有應進本裕豐益二倉米石暫存太平倉俟

道路稍乾。令大通橋再行轉運。○三十七年奏
准大通橋車戶掣欠逾額米石。向例責令買米
交倉。不准折銀交庫。如一時實難如數買足。但
以一兩四錢折交。名為加倍折銀。較之市價。實
屬減少。應將該役等逾額掣欠米石。按照五城
所報時價。量為加增。每杭米一石。現在市價銀
一兩七錢者。以一兩八錢折交。每秣米一石。現
在市價銀一兩三錢七分者。以一兩四錢七分
折交。即於該役等應領腳價銀內扣繳。凡有掣
欠逾額米石。一時未能買米交倉者。均照此例。

辦理○三十八年奏准通倉歷年積儲共米一
百五十餘萬石三十五六年直隸散賑動用甚
多嗣後於例進三十餘萬石之外多進十數萬
石以裕倉儲○四十五年定本裕豐益二倉坐
派漕糧嗣後頭進漕糧於四五月間果能依期
到通所有派運遠倉米石仍遵舊例辦理儻漕
船抵通較遲或坐派遠倉後適遇陰雨難以運
送即將米石改儲近倉俟三進南糧再行派撥
遠倉不必拘定頭進幫船內輪派○四十八年
定本裕豐益二倉距大通橋三十餘里每年應

存米二十餘萬石。本年因漕船趕緊回空。所有到橋米石。就近先儘京倉運進。以便迅速起卸。將該二倉之米。照乾隆三十六四十六等年舊儲太平倉之例。酌存數萬石。於運務更可迅速。○五十九年奏准。每年新漕進倉時。令倉場酌量舊存本色米石多寡。均勻派儲。並將某倉存儲某年分各色米石若干。造冊先期咨部。以便分別新陳割放。○六十年奏准。麥石一項。體質本嫩。恩豐倉地面狹隘。難以掀晾。仍照舊例。分派祿米等十倉收儲。聽內務府陸續取用。○嘉

慶五年定嗣後遇有向係平米復經分析改兌
名目者仍照平米之例正耗全數進倉不准開
銷折耗亦無給丁餘米○又奏准六七兩月雨
水較多道路泥淖車輛難行大通橋分進各倉
漕糧查照向例於太平倉暫儲米十萬餘石俟
運務告竣再令大通橋監督按照應進倉口轉
運交卸應用抗價廠費即於車戶應領腳價銀
內通融辦理毋庸另議開銷○十一年定石壩
露囤米石仍應裝運原派倉口收儲所有人工
繩席等項費用該經紀等自行備用毋庸另議

開銷。○十二年定西中二倉存儲白米粟米。係
例應留儲通倉。支放王公大臣俸米。其多儲杭
後二色。共米四十六萬餘石。除酌留數萬石。以
資看倉官兵等項之用。其餘米石。概令趕緊分
運在京十一倉。均勻派儲。○十四年奏准。嗣後
總漕咨送過淮糧船數目清冊到日。於各幫未
過津關以前。即由倉場衙門籤掣倉口。檄行各
該糧道及總運等。遵照俾各丁豫知。派定倉廩。
無所用其趨避。○又定幫船抵通倉場侍郎督
率坐糧廳親身查驗。東公辦理。其經紀止令起

卸米石。不得干預查驗米色之事。如旗丁與經紀串通舞弊。或以醜米夾混。或短收斛面。希圖彌縫虧缺。宜嚴密防閑。儻經查出一併送部治罪。○十五年奏准。每年糧船抵通。起卸石壩有軍糧經紀。專運漕糧。白糧經紀。專運白糧。其土壩運進通倉漕糧。向係車戶經理。現在著役二十名。乾隆五十九年。將官員俸米改歸京倉支領。通倉放米不多。每年應派之數。遂亦無幾。車戶等原無可用。莫如全行裁汰。以昭覈實。嗣後遇有轉運通倉事務。統歸石壩軍糧經紀一手

經理○十七年議准米質潮潤不堪久儲尚可
食用者由倉場查驗實在七成以上准其奏明
收兌另廠存儲先行搭放仍將糧道等查叅並
將米石不敷成色令糧道等分別賠補於下次
帶運○二十年議准大通橋監督於運進內倉
米石存儲號房致有微變內倉監督於運倉米
石驗收遲延均屬怠玩大通橋及內倉監督俱
交部議處其微變米石責令車戶賠補○二十
二年定中西二倉每年派儲杭稔二項米石新
陳接算不得逾一萬石之數○道光二年議准

京倉存儲米石。以放代盤。將本年新糧暫儲於
未經放米之興平祿米。太平。南新。萬安等五倉。
黑豆仍照四倉分放。粟米麥豆與杭稔體質迥
殊。不礙盤查。所有派儲東豫粟米麥豆照舊分
儲。○三年

諭每年各省漕糧抵通交卸分運進倉。有壩橋倉三處
逐加盤驗。立法本屬周密。無如因循從事。均未能實
力稽查。以致米石多有微變。嗣後漕糧抵通。即飭令
坐糧廳與經紀等認真細驗。如有攙雜潮溼之米。押
令幫丁等灑颺曬晾。一律乾潔。方准起卸。至到橋後。

經該橋監督驗有潮溼之米。即著該廳督率經紀灑
颺曬晾。再行轉運。所需經費。即罰令該坐糧廳賠交
三成。經紀賠交七成。其由橋運倉。責在該橋監督運
米車戶。已運進倉。責在該倉監督花戶。僅有挽潮之
米。分別令其灑颺曬晾。將經費著落該管官役等。按
三成七成分賠。以示懲儆。該倉場侍郎等。仍當隨時
嚴查。毋任各倉員稍存將就。務期米色純淨。以資積
貯。○又奏准米車出入各倉。本有兩路。重車須俟空
車行走。接踵進倉。不得空重堵塞。○又奏准城
外關米車輛。若值城內進運新糧之時。空重同

走一門恐有擁擠嗣後朝陽門外四倉支放米石時適遇新糧抵京在護城河西之倉領米車輒改進東直門在護城河東之倉改走東便門進崇文門○四年

諭向來豆石抵通止於舊太海運萬安儲濟四倉存貯每月劄放豆石亦於該四倉併劄該花戶等每於舊豆未完新豆已收致滋勒索攙和壓陳放新等弊自應將新豆另行派倉存貯俾免新舊牽混現在南新北新二倉空廢足數收貯嗣後著於南新舊太海運北新萬安儲濟六倉內何倉先行放竣即於何倉收

貯新豆其割放豆石按定倉口次序以兩倉併割俟一倉放竣再按次接放一倉並令該監督等出具並無顆粒陳豆印結報部查覈由倉場侍郎派委妥員查驗屬實再貯新豆以清積弊○又

諭橋倉各監督因驗收慎重車船轉運不能迅速以致米石積壓甚多易受潮溼嗣後著仍照舊例驗米之責專歸坐糧廳務令查驗乾潔再行起卸該侍郎等隨時赴壩抽查以防攙混轉運之責專歸大通橋分別天氣陰晴道路遠近以覈其運數之多寡毋任車戶稍有積壓兌收之責專歸倉監督遵照該侍郎等

坐派廩座隨到隨收。毋得藉故留難。任意高下。○七年議准。驗收漕糧。遇有潮溼夾雜米石。驗收之前。專責旗丁運員。驗收之後。專責經紀。○又議准。運米迅速。原在車輛齊全。口袋足數。令坐糧廳。大通橋監督認真點驗。務令車輛口袋一律齊備。仍由抽查御史。督同監督覈計。每日進米多寡。呈報倉場。分別勸懲。○又議准。各倉收受漕糧。例限紅單到後十日完竣。惟內倉收受漕白米石。於紅單到後。復催該幫投遞文冊。交納席片米樣。該監督驗看後。始能收米。以致遲延。

嗣後由倉場飭令坐糧廳於發給紅單時即催幫丁將文冊席片米樣一併交納照例十日內驗收。倘有需索遲延。即由部將該役等嚴懲。監督叅處。○又議准由橋入倉。監督不認真掣量。車戶漫不經心。口袋破裂。米多狼藉。易致偷漏。應令各倉監督認真掣量。如有潮溼短欠。即著車戶賠補。至口袋破裂。飭令隨時收拾。如有車戶偷漏。花戶含混收受等弊。即行照例嚴懲。如該監督怠玩。即查明嚴叅。○八年

諭內倉收貯漕糧限紅單到後十日完竣。嗣後內倉收

米務照議定章程不准稍逾限制。儻再有不遵者。該部堂官查明如係該倉監督遲延。即行叅處。如係該倉書吏花戶勒捐延緩。即照例嚴懲。如旗丁交納遲誤。即將該押運官叅處。毋稍徇縱。○又奏准紅單文冊到倉有米石尚未抵通者。未免參差。嗣後總於米石到後再發紅單。給發紅單時。即嚴飭幫下將文冊席片米樣一併交納。令該倉於十日內驗收。毋得遲延。○又奏准二進漕糧紅單文冊若隨頭進先後到倉。大通橋向不能兩進並運。自應於頭進運竣後再行起限。其三進漕糧

白糧亦一律辦理。○又奏准運米多寡視車輛有無向來車戶運米可以一日運至四五千石嗣後運米應以三千石為率不得稍減。僅有車輛短少無故藉延即將該車戶嚴懲。大通橋有督催之責若不嚴催任其遲緩一併分別查辦。○又奏准遇陰雨之時飭令車戶添雇車輛以便運送如遇大雨阻止及內倉有急須開放之米並甲日不開倉由大通橋內倉彼此移會暫緩一二日毋庸計限。○又奏准內倉原設有查倉御史其收放米石向有書吏逐日稟報嗣後

於每進漕白糧石收竣後即由內倉將紅單文冊於何日到倉該倉於何日進米某日收米若干何日完竣詳細揭報如有展緩一二日者亦俱隨時報明以備稽覈○咸豐八年奏准內倉收受白糧該倉監督等酌派筆帖式等二員會同倉場委員於開倉進米時在倉門首親身查驗不假胥役之手儻有偷漏狼瀝等弊即行從嚴懲辦如米色與坐糧廳先期封送之樣不符即令該監督隨時報部覈辦

欽定大清會典事例卷一百八十六

戶部

倉庾

發米出倉
虧米分賠

進倉收耗

平較斗斛

發米出倉。○順治十六年覆准各倉發米時。挨次支領。如有車輛擁擠及偷盜等事。拏送刑部治罪。○又覆准各倉發米時。不許在倉買賣。儻有串通倉役包攬糧米者。拏送刑部從重治罪。○康熙元年覆准每季發米。部差司官二人並旗員一人到倉與監督一同監放。有通同撓和糠土溼米等弊。倉場侍郎題參一併議處。若監

督不嚴查下役致有攬和糠土涇米並少糧索錢等弊將經管官交與吏部從重議處作弊下役交與刑部從重治罪至領運米之佐領領催並家人若將好米攬和糠土偷盜者亦送刑部從重治罪○又奏准八旗俸餉及上三旗米冊每季限上月初十日以內送部轉咨倉場照例兩月內支發全完如每季上月初十日以內米冊不送部該旗即將造冊遲延之官題叅交部議處○又議准官兵俸餉米既已造入冊內雖有升轉不計增補告休物故者停其裁扣仍給

原人其項補之人於下月支給如獲罪革退者
仍行裁扣○雍正元年奉

旨將八旗米冊送部各日期記明奏聞其舛錯駁回者
從再送冊之日扣算○又覆准鄉會場供給米內倉
應用米滿漢廩糧兵丁行糧禮部支取內監食
米光祿寺飼鷄米象房飼象米及散給囚糧內
管領下口糧均支老米其五城賑貧兵部箭匠
工部作管織染局匠役等食米均支稔米○又
奏准俸米兵餉舊例春秋二季關支限三月發
完將兵米分作三季俸米分作兩季限兩月發

完。○二年奏准上駟院及各王府飼馬鹿羴等處米。舊例係各倉監督運送。嗣後覈定應給米數。由部劄知各倉。別給印票。付領米官役持票赴倉支領。各倉監督查對米數相符。照數支給。不必著令監督頭役押送。如有需索加米等情。許該監督揭報題叅。○三年奏准八旗兵米。向例分京內八倉支領。今增設萬安一倉。後將護裁軍校驍騎校應領米。別分一倉。同八旗兵米。分作九處支領。○五年奏准。嗣後內倉每年所收芝麻百石。除各處支發外。將餘贖芝麻。過三年

後照例變價交庫免致久儲變色。○六年奏准各倉設立循環二簿舊例止記糧米收發數目嗣後將支發糶賣之數按照部咨及五城司坊官通州知州各印簿逐一磨對毋許舛錯。○七年

諭支發兵米之時如遇雨水稍多即寬限一月永為定例。○又奏准漕米儲倉向例按年挨陳支放凡有交受零數新米各儲一處不許入於舊米之內將放過米數並經手監督攢典姓名於某年月日收儲開明黏貼廩門仍於循環簿內註明報部

嗣後挨陳應發之廩並令掣籤開發。儻不掣籤致家人開放新廩者。事發照知縣失察家人犯贓例叅處。○又覆准各倉鋪設供給不得絲毫索派倉役違者計贓科罪。其監看放米旗員日用均令自備。儻與倉役勾通需索領米之人叅革計贓科罪。監督任聽倉役需索不查拏者照州縣失察衙役犯贓例議處。○又覆准八旗官員支領俸米每一佐領給票一張倉場驗明給發。○又覆准守衛

圓明園八旗官軍俸米月米東四旗於本裕倉西

四旗於豐益倉支領。○八年奏准。新增裕豐儲濟二倉。將護軍校驍騎校米。仍隨八旗支領。其鑲黃。正黃。正白等三旗米。別為三分。同八旗甲米。分十一倉闡發。仍將所限各倉及支發米數。開列廢名年分。五日一報。○九年覆准。八旗支領米冊。於各佐領總數下覈算。兵米分註。秬稷粟米各若干。俸米分註。白秬稷粟米各若干。送部轉行各倉。按色給發。○乾隆元年。奏准。監督失察。攢典混領倉米。希圖多賣。價者。照府州縣書役侵欺錢糧。不能察出。例以徇情論。降二級。

留任。○二年奏准。兵米分為四季。於二五八十一等月支給。或遇有閏之年。或值米價昂貴。後季米不能接濟。前季或南米抵通。需廩咸儲。隨時奏准。酌定先期開支。○又奏准。向例太常寺光祿寺及會同四譯館需用白糧二千餘石。王公百官俸白米十五六萬石。內務府

禁城兵丁及內監食用等項。需白糧萬石。今白糧減徵。應將王公百官白糧酌減一半。以秬米抵給。

禁城兵丁及內監白糧全改秬米。禮部支領各國

貢使及太常寺光祿寺支領祭祀等項白糧內
務府元宵糯米理藩院所領札薩克王貝勒貝
子公台吉各來使公主郡主額駙等白糧均照
舊支給。欽天監太醫院月糧宗學讀書宗室八
旗讀書覺羅左右兩翼教習

盛京吉林甯古塔索倫八旗額魯特等處送物米
京人員

欽安殿道士內監各處喇嘛以及匠役口糧全改秬米。
薊易二州每年截留白糧米亦減半以秬米抵
給。○三年奏准黑豆質堅多係隨收隨發並無

消耗遞減之數不准開銷。○又奏准旗人領得粟米糶賣不得過銀五六錢。今米價昂貴應將兵米內借撥代粟稜米十八萬石交五城十廠平糶所賣之錢易錢解部將來兵丁應支粟米內酌量豐收之年於秋冬二季每石折銀八錢陸續分年扣還。○又題准八旗兵丁四季領米每季所有零尾抄勾佐領總領分給每多折耗應將每年春夏秋三季所領三色米總數以斗為止散數以升合為止其抄勾零數歸入第四季支領。○又奏准

禁城兵丁及內監應支白糧改給秬米有折耗碾
碓之費。按原給白米一石改給秬米一石二斗
五升。○又議准每季領米時旗員查驗米質如
果不堪食用令於倉中封固即報倉場侍郎都
統查明具奏。○又奏准倉場侍郎於進米時分
定廩名將陳廩封固進米完日赴倉將新米丈
算覈足更換封條如進米之際適逢發米之期
該監督將挨陳應發之廩開報倉場侍郎委官
拆封監看。倘有不遵挨陳發給者將監督題叅
倉役究治。○又奏准每年春秋二季支發俸米

多有在通售賣者。以致米局鋪商賄託倉役。有
撞斛多量之弊。應令倉場侍郎於發米時。嚴行
訪察。如有前弊。拏送刑部治罪。儻查拏不力。別
經發覺。交部嚴加議處。○四年奏准。開倉時。每
旗委押旗參領於發米前一日。將應領米數。及
領米人數。開單交與監督。按數起票三張。於領
米後一日。一交滿監督。一交漢監督。一交監放
監督。稽察出倉。其領米兵丁花名。各旗開單。鈐
用佐領圖記。帶赴倉內。交與押旗參領點驗。進
倉。仍令嚴行稽察。如監督所屬人等作弊。押旗

參領查出。呈該管都統參奏究處。押旗參領所屬人等作弊。監督查出。呈倉場侍郎參奏究處。至米車出倉。除參領與監督等一同查對紅號外。其閒散驍騎校等。仍在倉門巡查。令米車挨次排行。嚴禁爭擠。○又奏准向例官俸米內有粟米一項。以採買直隸營田稻米抵支。但直屬或遇歉收。停止採買。即不敷支發。應以稔米抵稻米支給。如直屬稻米豐收。採買運通。仍支稻米。○又奏准各衙門筆帖式俸米。向例在通倉關支。但所領米數無多。赴通往返腳費頗重。嗣

後改於京倉支領。○七年奏准通倉節年存積白米數多。所有王公官員俸米內應放發米。以白米抵給。俟陳米將完。奏明停止。○八年奏准嗣後八旗官兵馬駝應需料豆。應於河南山東二省粟米內改徵黑豆。撥運京倉。於每年九月馬駝回廠。每匹月給黑豆一石。以資芻秣。至次年四月出廠之日停止。毋庸給銀採買。○又奏准恭遇

巡幸之年。各旗馬駝留養

京師。自四月以後。仍酌量支給本色黑豆。其豆價

照例扣除。○九年奏准各倉現存米內。杭米數多。稜米數少。不敷支給。自九年十一月開放頭季甲米起。至十年七月開放四季甲米。全支一色杭米。一年後仍照舊以三色搭放。○十年奏准嗣後八旗關支馬豆。定於每月初十日以內支給。前月之枹。先行造冊送部。創倉如限內冊不送部。照造冊遲延例議處。○十一年奏准內倉餘存米石。日久恐致紅朽。所有在京滿漢文武官員俸米。改赴內倉關支。放完之日。再行停止。○十二年奏准八旗官冊俸米。總以十二月

十五日。六月十五日。兵丁米總以上月十五日。作為過冊定限。各旗送冊。或因遲速不齊。或因舛錯。駁回校正。以致逾限。總以月之十五日為准。分別關支裁扣。如官兵升轉。在定限以前。准其支領新任俸餉。在定限以後。不准支領新任俸餉。其告休物故。在定限以後。准其支領銀米。在定限以前。不准支領銀米。其開倉發米。總以每季孟月初一日作為定限。如官兵降革。在每季初一日以前。其米概行追繳。如在初一日以後者。免追。至各旗兵丁逃亡。將應交米折銀暫

存旗庫於次年三月彙總交納。十四年定儲
濟倉廩座最多。劄放甚少。嗣後每年應劄零檔
米石。儲濟倉照各倉之例一體分劄。十五年
奏准。儲濟倉歷年收存杭米最多。嗣後本倉應
放稔粟二米。全以杭米抵給。並將領米最少之
包衣三旗。停其於儲濟倉闔掣。以資疏通。十
七年

諭。向來八旗兵米。皆按四季支發。但發完之後。因去下
屆發米之期尚遠。鋪戶得以乘機囤積。米價日漸昂
貴。若將兵米陸續支發。俾源源接續。殊有裨益。但就

一季之中。再為分次支發。未免紛繁。其應如何酌分旗分。按月輪發。著妥議具奏。欽此。遵

旨議定。兵米既按月輪發。應分別旗分。將鑲黃正黃二旗分於四孟月。正白正紅鑲白三旗分於四仲月。鑲紅正藍鑲藍三旗分於四季月。各旗依酌定月分赴領。則辦理不致紛繁。米糧時得接濟。於兵民均有裨益。○又覆准。各倉發米時。滿漢監督皆在官廳檢閱米冊。從不親至廩口。一任家人倉役在廩支發。易滋弊端。嗣後務令一人在廩口監看。儻仍前偷安。查倉御史即行糾叅。

○又奏准向來各倉整廩係倉場總督封識其發過殘廩即交該倉監督自封自開嗣後凡係殘廩皆由都統御史封識發米之時驗封啟鑰○又奏准各倉廩米務令挨陳開發報部查覈如王公等所差領米之人揀選新廩許監督稟報倉場侍郎及御史指名參奏交部治罪監督如違成例越廩支發一併叅處○又覆准嗣後京通各倉監督發米務照總票數目令該旗全運出倉聽其自行售賣儻領催及領米之人串通舞弊聽稽察御史指名題叅將該領催等從

重治罪。並曉諭官民米局。如有於總票中私分小票。或於封倉後私赴支領者。經步軍統領等衙門查出。將賣米之人。無論王公大臣官員。皆即指名題參。其倉役及賣米人等。照偷盜例究處。所賣之米。全數留倉。○又奏准京倉米雖屬挨陳支領。但每季兵米各倉均開廠支發。而新漕運京。又須分派兌收。是一倉之中。有新有舊。有發有收。牽混不清。錯雜難覈。應將京倉八旗兵米。及官俸役食等米。每月止開一倉。先儘一倉發完。再開一倉。以次開支。其空出之廠。挨次

收儲新漕。俟各倉支發全完之後。仍照收漕先
後挨陳發米。再京倉既定先儘一倉。以次支發。
則現在發米之倉。即應委官稽查。其餘各倉。毋
庸各差御史一人。應以本年為始。每年差滿漢
御史二人。專查京倉。凡遇收發之時。該監督先
期知會該御史等。輪流稽察監看。儻有違例出
入等弊。將該監督題參治罪。○十八年議准八
旗甲米。既按月輪放。每月止開放兩倉。必須一
旗放完。接放一旗。雖定限兩月。總不能如期放
完。若多開一倉。令一倉開放一旗。則定限一月。

已可按限完竣。至補領零檔陸續劄倉支放。應以劄倉之日起。定限十日放完。○二十三年

諭京師米價較上年稍為昂貴。向來京官俸米例於八月支放。著提早一月。即於七月開倉支放。俾京城內外米糧充裕。價值自可平減。○二十四年

諭今歲京師因夏閒得雨稍遲。降旨分廠平糶。通融調劑。現在時近年節。糧價未能即就平減。著將在京三品以下滿漢文武各官。准其豫支半年俸米。於來年春秋兩季應領俸米內分扣。即准於京倉內按數支放。○又定本年秋季俸米內應支粟米。以黑豆抵給。

其扣存粟米備五城糶賣。○二十五年議准王公名下之藍白各甲。以及下五旗包衣。又民公侯伯及各大臣等名下坐甲米石。移於通倉支領。俟通倉陳積漸疏。再行照舊辦理。○二十六年定。各倉開放米豆。無論該年所收米豆。已未放完。即將本年現放過若干。按廠覈明盈虧數目。詳細開報查倉大臣稽覈。於年終彙奏。○二十七年

諭舊例王公等甲米。原在京倉支放。後因通倉糧石陳積。部議改赴通倉關支。第往返運費。必多虛糜。其中

或將糧石就通糶賣於八旗口食轉無裨益。所有今年五旗王公等甲米及八旗佐領坐甲米石俱著在京倉支放。嗣後每年通倉貯米酌量數用。倉場侍郎等即奏明多運京倉。俾王公等甲米支領既不需跋涉。而於日用益為饒裕。○又議准京倉開放八旗甲米。須查明倉口米石之新陳。挨陳挨倉輪流接放。不得先後越次。其劄倉旗分於每月初一日令應行派放之該監督親身赴部。籤掣旗分開放。○二十八年奏准各倉發米務於即日全放。或緣陰雨車輛短少不能悉行領出。將應領米

票呈繳。次日由倉驗放。不得持票歸家。○二十九年議准。西中二倉白米存積過多。前將官員俸米內抵粟稔米改支白米。又從前俸米內以杭抵白之米。仍以本色支給。今西倉白米現存十二萬餘石。中倉白米現存二十四萬餘石。自明年春季為始。除劄中倉應放旗分外。其劄西倉旗分。俟杭稔糯米放竣後。將應領白米冊檔移交中倉開放。以疏陳積。再中倉白米存積既多。應於到通白糧照所進漕糧配算收儲。使二倉漕白二色不致多寡相殊。○三十一年議准。

官員應得糯米一項。前因江浙二省白秔糯米酌半改徵漕糧。故減半以秔抵給。今西中二倉糯米存積已久。應將從前抵給之糯米全行支給本色。俟陳米疏通。仍以秔米抵給。○三十三年議准。漢官應支俸米。以該監督知照開倉之日為始。定限四十日。逾限不領者。倉場侍郎報部註銷。○又議准。各色米石。均按本色挨陳支放。務將所開廩座逐廩見底。如有不能放竣之處。歸入下月支放。仍按月分析各數。咨報戶部。○又定。京通各倉一年所收米石。全數放竣。倉

場會同查倉都統御史將原儲收放贏餘各數逐廠詳查確數造冊具題戶部覈對題覆。又定各倉監督遇有升遷事故及任滿交代時未放完之米將原儲各年米石放過若干尚存若干照例呈報倉場委員查驗仍按照整廠驗封零廠抽盤之例報部。○三十五年定各倉放米務遵舊定章程平斛支放不得以贏餘米數無關考成不加慎重並不得藉口贏餘有意剋減如花戶人等稍有情弊立即送部治罪。○四十年議准八旗王公漢官俸米以及官員隨甲

坐甲餉米均在通倉支領。驍騎校親軍校前鋒校護軍校米石同護軍領催等一例在於京倉開放。○四十三年奏准開放八旗兵丁閏月甲米令倉場侍郎照四季甲米之例豫期查明倉口報部辦理。○四十四年定各倉開放土米時務令各城司坊官親身赴倉關領並令查倉都統御史前往監看如領出之米與所估成色間有不符許該司坊官即時稟明查究仍將所領米樣照例封送巡城御史暨監糶部員稽查辦理。○四十八年奏准祿米等十一倉粟米不敷

應照例以稜米抵給。但各倉稜米存儲無多。稜米甚屬充裕。自四十八年十二月起。至次年七月上。每月應放稜米。以秬米暫行抵給。本年新收江蘇秬米。聞有青腰白臍。難以久儲。八旗應支秬稜米石。即以此項秬米。儘數先行支放。俟放竣後。仍照例以舊存秬米抵給。統俟四十九年新漕抵通後。仍按本色開支。○五十二年議准倉存麥石。如麥賤於米之年。抵作俸米支放。如麥貴於米之年。抵作甲米支放。○五十四年議准每月三旗應領甲米。將城內之祿米等七

倉並附近關廂之太平倉。分為二旗。城外之萬安等三倉。分為一旗。挨陳支放。如城內米石。一倉不敷支放。即於附近之倉支領。不得以城外遠倉找給。城外萬安等倉。亦照此辦理。仍將各倉存儲各色米石。查明報部。○五十七年

諭旗員應支俸米。自當赴倉支領。何得將米票擅交鋪戶領賣。致啟包攬情弊。嗣後著八旗都統徧行傳知。無論大小官員。俱令自行赴倉支領。如有仍將米票私給堆房米局包領者。一經查出。即行叅處。以示懲儆。欽此遵

旨議定八旗並內務府官員應領俸米各旗都統仍出
給本旗總領交押旗參領章京先赴通倉換票
該倉即按照各佐領官員數目每員各換給米
票一張交該參領等領回發交各該佐領散給
應領俸米官員令其自行赴倉關支則隨到隨
領可杜包攬代領之弊。五十九年奏准每月
三旗輪放甲米毋庸倉場坐派倉口徑由戶部
按照在京祿米等倉挨定次序於每月初一日
豫定三倉令該三旗分往關支俾一旗之甲米
統在一倉承領或三色米內間有一色不敷即

可按成抵給總不得赴別倉找補。又奏准廩座次序以所儲之米新陳為定。令倉場豫為覈明。派定挨陳廩座字號。將應放米數造具清冊。於上月二十五日以前送部。仍將每月放過米數出具並無攙和情弊切實印結送部查覈。又奏准各監督每月放米全完即將零廩空廩米數申報並將存儲米石造冊報部。仍將零廩米樣送部以便下次接放時較對。又奏准火器營官兵米石向在海運北新二倉支領殊屬寫遠嗣後改歸本裕豐益二倉酌量道路就近

支領。○六十年議准閏月甲米。按照祿米倉例。以最陳之三倉割放。○又議准武備院甄匠應領米石。在本裕倉就近關支。○嘉慶元年

諭。向來各省運京漕糧俱係交貯通倉。嗣因文武微員遠赴通州關米。不無糜費。因加恩交部酌議改運京倉收貯給發。原以示體恤之意。惟是改貯京倉後。運丁又須赴京交米。雖津貼之費。原在該丁等餘米之內。並非另有增添。但多一周折。未免多一番勞費。嗣後江浙白糧俸米。應仍舊運貯通倉。至他項俸米。或可仍照新例。就近在京倉關支。或一併照舊。均行改

歸通倉之處。著交戶部會同倉場悉心詳議具奏。以期經久無弊。欽此。遵

旨議定。江浙白糧仍舊運貯通倉。其旗丁津貼經紀車戶之米。應即停止外。至文武官員應領俸米。內有白糧粟米。概行劃歸在通領米之王公大員支領。其在京之領米文武官員。應領白糧將王公大臣應領杭米。照數抵給。○又定。各倉開放大檔三色米。闔掣時。先儘最先儲米之廠。覈計米數。令四固山闔掣。滿洲所餘之廠。即令包衣接領。蒙古漢軍遞次接支。其餘賸零廠。下屆輪

放時另書一籤令該旗都統副都統眼同科道
先行闔掣後再將應放最陳一年之整廩闔掣
開支。二年定五營兵丁餉米內中營米石劄
豐益倉就近支領其四營兵米按文冊到部月
分於本月輪放甲米三倉內覈計米數多寡以
領米各二千餘石合計約五千餘石之左右二
營並劄米數最多之一倉南營領米四千餘石
劄米數次多之一倉北營領米二千餘石劄米
數較少之一倉。三年定各旗支領俸米令各
旗各倉一體封送米樣以憑查覈其領竣日期

一併報部。又定各倉開放豆石。向係隨時傳放。未定限期。嗣後照支放俸米之例。自呈報開斛之日為始。定限六十日完竣。逾限不完。該監督照俸米例覈議。如領豆官兵違限不領。將應領豆石停給。其豆價於馬乾銀內坐扣。不准領回。○四年奏准各倉埽收零星米石。飭令倉役隨時曬颺潔淨。歸入贏餘項下。作正開支。○六年奏准每月三旗甲米。於城內祿米等七倉內輪劄二倉。開放二旗。於城外太平等四倉內輪劄一倉。開放一旗。○又議准廠馬到京。應領餽

馬豆石以兵部傳知領馬之日起限十五日內造冊送部各倉於五日內呈報開斛於兩月限內一律完竣違者叅處○又

諭嗣後開領俸米如有逾定限不獨將該員應領米石照例扣留存倉並當治以遲延之罪欽此遵

旨議定支放俸米春季自二月起秋季自八月起逾限不完監督並監放官一併議處如領米官員無故違限將米石停給仍分別議處○又議准八旗滿洲蒙古漢軍並內務府官員應領俸米戶部於開斛時行催各旗源源支領並令各倉按

五日一次報部以備查覈。○又定朝陽門外開倉放米。該監督將米車挨次逐輛放出倉外。不准齊放。自倉門至朝陽門。交該營弁兵逐段稽查。不許爭先搶越。其朝陽門至城內大街。責令左翼翼尉。該城門官及步營官員管束。如遇三倉一齊放米之日。多派官兵按段稽查。開通道路。不得擁擠。尋常車輛。各分上下車轍。逐段隨行。車戶人等不遵約束。立即枷號示衆。至通州二八月開放俸米。令該營自朝陽門外東嶽廟之東管轄進城。設遇城外五倉有開倉之日。買

賣輕車俱令由東直門行走以免擁擠。○七年
議准各倉開放俸米令倉監督先將應領各員
具冊送查倉御史事竣後即將所收領票於五
日內照冊註銷仍將領票呈送倉場衙門以備
查覈。○又議准萬安東西兩倉開放米石先儘
年分最陳之米開放如此倉陳米足數開放不
許再開彼倉致滋弊竇如一倉陳米不敷必須
在彼倉找放仍照挨陳之例辦理不得越次關
支。○又議准升調人員趕領俸米向係移咨倉
場侍郎臨時飭倉覈放是以未經定限嗣後趕

領米石。旗員以倉場侍郎劄倉之日起。漢員以部文到倉之日起。均定限三十日。逾限不領扣米存倉。仍將春季趕領之米歸春季俸米之倉。穀放秋季趕領之米歸秋季俸米之倉。穀放毋得另劄別倉。統俟領竣報部查覈。○八年定閏月甲米向係查明年分最陳之米。穀劄三倉。近年倉儲之米年分相等。並無陳米可劄。議將下月輪放甲米三倉。作為閏月開放。以後每月旗分倉口挨次遞推。○十年定八旗支領甲米如有不肖領催等將兵丁米石擅行強賣者。除將

約束不嚴之領米參領叅奏議處外。並將抑勒賣米之領催等嚴行懲辦。其賣出米石責令該領催加倍償還。○十三年議准嗣後倉場將下月應放之倉口廠名米數清冊。務於上月二十日以前送部覈對。戶部即於二十七八等日發檔到倉。該倉於初三日以前開廠開放。仍以定限一月完竣。儻有遲延。照例叅處。○十四年

諭天庾正供理應出陳貯新。不容任意支放。向來王公大臣官員等。於領米時往往挑索好米。甚至有請託支領之事。實屬可鄙。其八旗兵丁等有能給予花戶

錢文者尚得開支好米。否則以潮溼米石充數。致令兵丁等不堪粒食。稟請都統參奏。而倉場等則又以倉中應放此米為詞。紛紛爭論。殊屬不成事體。因思各倉貯米。原不能盡屬鮮新。王公大臣等所得米石較多。若概索新米。則陳米不能支放。日久必多紅朽。而兵丁等所支全屬醜米。亦非甘苦與共之道。嗣後王公大臣及官兵等應領米石。著倉場侍郎按照米數多寡。將陳米新米均勻搭放。庶王公大臣等無從過事挑索。而兵丁食米不致偏枯。行之日久。倉貯米石出陳貯新。自無腐變之虞。儻或王公大臣及兵丁

等因不能全得好米在倉壞爛即將挑剔之米概行扣除不准支領以息爭競設該倉米石均屬朽變強令支領准領米之人首告該查倉御史及該旗都統等奏參辦理○又奏准各倉所放俸甲米票該監督呈送查倉御史查閱當堂截去左角塗銷收竣後彙送倉場衙門存案○十七年

諭各倉支放甲米時如本係好米實無攪和微變情弊旗人故行挑斥米色者著該監督報明倉場侍郎據實參奏儘或倉米果係低潮該旗人毋庸在倉爭論即將米樣包呈該旗都統副都統據實參奏朕派員

赴倉查勘。如米石實不堪食用。定將監督懲治。若米石並無不好。旗人妄行呈瀆者。亦必加以懲處。○十九年奏准。

圓明園三旗營房人員。每季米石就近在豐益本裕二倉支領。○二十一年覆准。通倉遞年積存白米二十四萬餘石。腐耗堪虞。所有京倉領俸滿漢官員文職四五品武職三四品及四品以上世職。本年秋季應放秬秠米石。暫移通倉以白米抵給。○又覆准。王公大員每年應領粟米三萬二千餘石。以通州中西二倉支贍白米二

萬七千餘石

中西二倉每年收白米八萬八千餘石除運交內務府九十餘石支

故王公大員俸米五萬二千餘石應餘存二萬七千餘石儘數抵給不敷粟

米仍以本色找足其餘粟米概行運儲京倉以

備支放甲米圈粟之用○二十三年奏准內倉

遇有積存米石由戶部查明具奏改放八旗滿

洲蒙古漢軍文武職任暨世職官員俸米並將

所存米色量為配搭○二十五年奏准各旗零

檔補領俸甲米石

官員升遷兵丁拔補日期在米檔過部以前未及入檔者

准其補領新缺之米又八旗世職補該旗冊造放外任回旗後准其補領存倉俸米

何人補領何季之米由部覈明徑劄該季原劄

之倉開放其存倉俸米不止一季者徑劄該首
季所存之倉按應領之季照數開放各倉自接
奉部文之日起限五日傳旗關領均按三十日
放完漢員補領米限期同仍將傳旗放完各日期報部
查覈逾限不完將該監督議處如係領米官兵
無故違限米石停支○道光二年

諭倉儲為天庾重地欲杜虧挪立法必臻妥善大學士
等議請隨時派員抽查不為無見朕思剔姦釐弊之
法總須按照倉廩實貯清冊逐廩查驗見底俾新陳
不能牽混難於掩飾自不如以放代盤事歸簡易著

仍照戶部原議自本年七月為始務使盤放之三倉陳米顆粒不存。驗明再進新糧以後挨次盤放。遞至三年即可全竣。果能實力奉行。不特目前挪移可杜。即後進新糧冊檔可稽。衆目共睹。如有虧缺。責有攸歸。如此立定章程。於倉儲實有裨益。○又奏准內倉應放各項米石。除各國貢使及年班蒙古應領口糧。毋庸定限外。其在京衙門及各該處應領俸米口糧。按季支領者。予限六月。按月支領者。予限三月。如逾定限不領。將米豆存倉。歸入正項支用。○三年

諭嗣後各倉收米時令監督將各廩貯米按廩包取米樣鈐印送部將來各旗赴倉領米如果米色平常即報明查倉御史並將米樣專案送部該部提取原送米樣覈較如有不符即行照例叅辦○又定外火器營鳥槍馬甲錢糧係入城外檔內關支而應領米石仍在城內殊多未便嗣後鳥槍馬甲三百五十三名並有米養育兵五十七名一併入於外營錢糧檔內由本裕豐益二倉按季支領○四年奏准各倉豆石充餘其王公大員應領江次粟三色俸米均以黑豆抵給白米全支本色

文武官員應領稜米。全以黑豆抵放。秬米抵放。二成黑豆。仍給八成本色。○五年奏准。各倉開放滿漢俸米。責成各倉監督。於開斛五日之先。報部。行文八旗及領俸各衙門。換票支領。並令各倉按五日一次報部。儻不遵辦。致逾限未能領竣。即將該監督叅處。○又議准。開放俸甲各米。由部按季劄放。所有劄倉事宜。開列清單。豫行咨明倉場。分別米數。均勻派儲。各倉現在收存之米。即當豫計明年劄放之數。俾秬稜粟三色米石。按旗開放。有贏無絀。不得米色參差。並

令倉場於進米之先。所有氣筒席片松板楞木。嚴飭照數交倉。各倉監督認真鋪墊。如花戶人等有偷賣等弊。立即嚴懲究辦。查倉御史一體稽察。又定。稔粟抵通。按照祿米等十一倉。均勻分儲。並令各倉另留粟米一千二百石。以備上駟院園粟之用。按倉分劄其支領豆石。每年以兩倉並劄。又定。開放八旗養育兵稔米。仿照甲米之例。三倉並劄。兩黃旗共劄一倉。兩紅旗並正藍旗共劄一倉。兩白旗並鑲藍旗共劄一倉。每年按定倉口次序輪轉。周而復始。不得攙

越稜米抵通時。並令應放養育兵倉口。各留稜米一萬五千石。以備劄放。○九年

諭外倉領放甲米。著倉場侍郎飭令外倉監督。務須遵照定限。米車每日於巳刻到門。不得過午。每逢放米之日。先將本日定放米若干石。片行稽查御史。以便覈對。每日進城與出倉之數。並著各旗領米參佐領。督飭領米領催。親身到門投票。毋許差人代遞。○二十二年。奏准王公以下及八旗世職。並滿漢文職三品以上。武職二品以上。應領江白次粟四色俸米。文職四品以下。六品以上。應領杭稜二

色俸米均於每員名下。各覈減一成支領。凡支江白次粟四色俸米者。統於次白米項下扣除。支秬稷二色俸米者。統於稷米項下扣除。其餘應領各色米石。仍令照舊定數目開造。並將覈減次白米及稷米若干。在於俸檔內分析註明。其武職三品以下。文職七品以下官員。及支領半俸之孀婦。毋庸減放。○二十五年奏准。二十六年春季俸米。王公以下三品以上大員。應領通倉俸米內。每石搭放稷米二成。即於白米項下照數抵扣。文職四品以下。武職三品以下官

員應領京倉秬米內。每石搭放稷米一成。甲米自正月起。每石五斗秬米內。亦搭放一斗稷米。均於秬米項下抵扣。其內務府三旗包衣家口米石。向係一色秬米。亦照甲米章程。每石搭放二成稷米。俟來年新漕各色米石全數進倉。仍復舊制。○又定各倉每月收放米麥豆。均於每月底將原存新收放過實在何項何色各細數。分析註明。造具印冊。呈送倉場。倉場彙總開單。同原送印冊。於下月初五日以前送部稽覈。其並無收放之倉。亦於單內聲明。○二十九年奏

准河南省歲運白麥除內務府光祿寺等處支
用外餘賸麥次年仍加謹存倉留備蠲緩年分
應用至次年新運到通即將最先餘賸之麥與
漕麥一律搭放○咸豐三年奏准內倉尚餘杭
米三萬二千餘石黑豆五千餘石未便久儲向
食本裕豐益二倉之

圓明園健銳火器等營兵丁甲米內每石四斗杭
米即在内倉積存餘米內照數開放統放三箇
月足敷支用俟三箇月後仍復舊章辦理至積
存黑豆應於各旗營馬豆項下覈實放給以免

折耗。○同治元年覆准鑲黃旗兵丁應領十月
季甲米每石內二斗秔米仍由北新倉以秈米
抵給。○六年覆准各衙門應領米石除向由坐
派倉口關領者仍照舊辦理外其向無派定倉
口者由戶部堂官臨時親自派割毋庸由承辦
司分按次擬派。○七年奏准各倉開放甲米以
部文到倉為始該倉無論有無未放款項均令
即時開放各清各款不得藉詞積壓儲米廢座
務令公同關掣不得指廢關領其各倉各旗放
領米石統令依限報竣儻敢稽延即由戶部將

該倉監督從重奏參。花戶送部治罪。旗員由本
管都統查明參辦。○又奏准各倉存儲米數。放
至來年三月。即有不敷。應自八年正月起。將兵
丁甲米每石內本色二斗。秔米改放一斗本色。
其餘一斗。按秔米例價。每石以一兩四錢實銀
折給。○八年奏准覈計倉儲足數一年之用。所
有八旗甲米。自本年正月起。仍開放本色秔米
二斗。五營兵米亦即仿照辦理。○十二年定
圓明園暨外火器營健銳營官兵。關領俸甲米石
向在本裕豐益二倉支領除

圓明園照舊辦理外

分左右翼
坐派兩倉

其外火器營坐落

藍靛廠健銳營坐落香山均距本裕倉較遠夏
秋多雨腳價倍增所有外火器營並健銳營官
俸無分兩翼春季在本裕倉支領秋季在豐益
倉就近支領至外火器營兵米無分兩翼夏秋
兩季在豐益倉就近支領春冬兩季在本裕倉
支領健銳營兵米無分兩翼夏秋二季按月在
豐益倉就近支領春冬二季按月在本裕倉支
領過閏均准隨季關支○光緒五年奏准太平
儲濟二倉業經修復進米嗣後八旗甲米及漢

員俸米一體輪割。○八年議准自光緒九年春季起將滿漢俸米按祿米南新舊大海運太平北新富新興平儲濟等九倉依次輪割並令倉場衙門於新漕到壩時均勻派進務使存米倉口皆敷割放不得稍有偏枯

進倉收耗。○各省正兌漕糧抵通每石耗米二斗五升。進倉時每正米一石收倉耗七升。尖米四升二合。又尖上加耗米二合九勺四抄。又節省盤牘耗米三升。內除尖米四升二合作三年遞減外。仍存三項米一斗二合九勺四抄均作

正開銷其餘一斗五合六抄米內五觔盤運折耗米二升。曬颺折耗米四升七合六抄。給運軍回船食米三升八合。改兌漕糧抵通。每石耗米一斗七升。進倉時每正米一石收耗米四升。尖米四升二合。又尖上加耗米一合六勺八抄。以上三項米內除尖米四升二合作三年遞減外。仍存二項米四升一合六勺八抄。均作正開銷。其餘米八升六合三勺二抄內。曬颺折耗米四升八合。給運軍回船食米三升八合。○順治十六年覆准。京通各倉所收漕米不及一月者不

准遞減一月之外。每石每月。於尖米內遞減折耗米一合一勺六抄。以三十六月為止。此外不准遞減。至內倉白粳米糯米。如耗米四升九合九勺七抄八撮八圭者。每石每月。准遞減二合七勺七抄七撮七圭。如耗米二升九合九勺九抄八撮八圭者。每石每月。准減米八勺三抄二撮三圭。通州倉白粳米糯米。每石每月。准遞減二合八勺三撮三圭。糙粳米。每石每月。准遞減三合七勺七撮。餘均作正支發。各倉收儲黑豆。照米例遞減。○雍正五年題准。交收漕米停止。

曠颺將原備折耗米四升七合六抄。令各監督
於漕米進倉之時。抽掣一二袋驗看。如有潮溼
計其折耗。將未驗看之米。照此計算。餘米歸入
正項支銷。○乾隆十七年議准。漕糧到通。自停
止曠颺。將原備曠颺米四升七合零。儘數交納。
是此項米石。既已作正交納。若又儘力曠颺。則
原備之米。已皆折耗。自不應額外重出。苦累旗
丁。嗣後除攙和微變者。照例參處外。其餘抵壩
米石。如果乾潔。毋庸曠颺者。即照例起卸收受。
將原備曠颺之米。一併交納。作正支銷。如米色

潮溼過甚。倉場會同巡漕等官。驗看曬颺。計其折耗。將原備之米補足。免其額外交納。仍有不敷。責令買補。如抵補有餘。仍歸正項交倉。○十八年議准。潮溼米石。責令旗丁自行曬颺。按數買別幫食米賠補。如不足額。即照起欠例。將弁丁叅處。所欠米石。下年搭解完交。○又議准。潮溼米石。責令旗丁自行曬颺。按數買補。此專指抵壩時言。並未將入倉驗耗之例。指明停止。嗣後抵壩曬颺。進倉抽驗。應二例並行。毋致花戶人等暗中滋弊。○嘉慶五年議准。山東河南二省。

原備曬颺米石除劃付旗丁及曬颺折耗外尚有餘贍自應儘數作正至麥石及江南等省秔稈米除劃出給丁外無可作正應將劃贍米麥儘數准其折耗尚有不敷令其在於三升八合餘贍米內撥出八合量為抵補並令倉場實力稽查飭各倉將抽驗折耗確數切實結報如遇折耗過多至二升以外准其將八合餘米通融撥抵不得再逾此數如或無須撥抵仍將備抵之米歸入原款報銷

平較斗斛○順治初年定凡搭運無耗平米到

壩起交

如搭運節省脚米一項原係耗米是以謂之無耗平米

石土兩壩

概以加二五紅斛折算正數起運京通各倉給

發脚價倉中仍照平斛收受入廩又起運德州

倉糧改兌平粟米到通

應運德州倉粟米改如運到通亦係無耗

如

於石壩起斛照例以加二五紅斛折算正數起

運京倉給發脚價如於土壩起斛照例以加一

七紅斛折算正數起運通倉給發脚價倉中仍

照平斛米數收受入廩○五年題准供用庫

顏料

舊存紅斛與通州錢斛較掣紅斛甚大錢

斛甚小酌量將紅斛減改永為斛式○十二年

題准製造鐵斛頒發倉場永遠遵行。○康熙四十三年題准頒發倉場總漕及有漕各省部存祖斛一張祖斗一箇祖升一箇。○又題准各衙門發出倉糧均應照部頒鐵斛其坐糧廳收兌漕糧進京倉者每石加耗二斗五升進通倉者每石加耗一斗七升向用加二五加一七紅斛連正耗米同收以省量算之煩應仍照舊例。○雍正八年題准每省糧道添鑄鐵斛一張。○乾隆三年奏准每倉造具鐵斛一張作為樣斛各旗委放米之員以木斛較對樣斛兌發以木橫

打平。嚴禁簸箕歪量之弊。○又奏准修造斗斛。均令呈報倉場侍郎較準記烙火印。儻有不呈報較對烙印即行私用者。題叅究治。○五年奏准各倉木斛。三年一次建造。於解通板木內取用。工匠鐵葉。每張給銀七錢。於通濟庫內支用。○又定各倉收放糧石。應用木斛升斗。照部頒格式成造。所需木料。向係隨漕板木內動用。每斛一張。工匠鐵葉共計價銀七錢。三年更換一次。京通十五倉內。惟通州二倉及本裕一倉所需工價。於輕齋銀內支用。造入通濟庫奏繳冊。

內報銷其京城祿米等十一倉前項工價係監督等自行捐墊例不畫一。照例將十一倉成造木斛需用工價銀兩一體歸於通濟庫內支銷。○八年題准改鑄小口鐵斛頒發倉場並有漕各省照式鑄造遵用舊存鐵斛繳銷。○嘉慶六年議准各倉所用收放米斛每晚隨廠封儲次早驗封給發通倉由倉場侍郎查驗京倉由查倉御史查驗如與部頒鐵斛稍有贏縮飭令隨時修整。○道光九年

諭易州斛斗一套由倉場衙門如式製就較準烙印並

咨行工部製備斛斗一套一併送交戶部與部存祖
斛三面較準分頒易州及承辦事務衙門以昭畫一
其存貯舊斛均即送部拆毀自此次製備之後各宜
加意收貯不得損裂以致斛面增添該州不得仍以
米石不敷為詞致虧倉貯○十五年定戶部印庫附

儲鐵斛一張鐵斗鐵升各一箇

嘉慶十二年由工部照倉場錢

斗鐵升

鐵火印一柄

道光十五年由工部鑄造

共四件凡遇

工部新製各處應需木斛斗升派員赴部會較
戶部亦派司員同當月官於印庫內取出鐵斛
斗升三面較對如無參差將新製木斛斗升包

裹鐵葉。眼同烙用火印。給發領用。該司員仍將鐵斛斗升火印。一併封妥。附儲印庫。○二十四年

諭。倉場衙門。向來設立官斛。不容顆粒短少。此次祿米倉花戶。膽敢擅設私斛。減放甲米。似此營私舞弊。恐各倉均所不免。著倉場侍郎會同查倉御史嚴密訪查。如有花戶另造私斛。即拏交刑部治罪。並將該倉監督指名叅奏。經此次飭查之後。若再有前項弊端。一經發覺。惟該侍郎等及查倉御史是問。毋得視為具文。日久生懈。

虧米分賠。○光緒十三年奏准查漕運全書載
辦理倉虧章程。勒限一年。按照市價折銀賠補。
除以應領本折俸米及指借俸票存倉抵交清
款。並限內交清之員。毋庸議處外。其完不足數
及顆粒未交各員。初次展限。暫免議處。再予限
一年。責令完交。至遞次展限。賠繳五成以上。免
其議處。未及一成之員。先行交部議處。顆粒未
交各員。交部嚴加議處。仍遞展期限一年。勒令
埽數賠繳等語。歷經照辦。上年祿米倉虧短米
石。未將成案奏明。以致歷任監督皆議革職。恐

追賠徒託空言。於倉儲終無裨益。嗣後倉糧虧欠。除扶同舞弊者。立即叅革外。其廉謹之員。暫緩叅革。准將應領廉俸銀米扣抵賠款。如有不敷。勒令三年一律交齊。僅限滿交不足數。按照成數。議以降調。如顆粒未交。再行革職。庶為平允。